



O Volapükaf lens Valöpo !

Liedo vedob baidikum - atosi ologols de Sirkülapenäd mula pepasetöl, kö etikob, das binobs nogna ün yel telmil. Jinos obe, das drimälöb ai plu! Säkusadolsös obi !!

Omemols ye, das no ädrimälöb tefü resodatoped nulikün tiädü : „www.yahoogleups.com” Is kanoy reidön e bespikön dinis Volapükik. Hifümukan binom flen *Jay Bowks*, kel kleiliko vilom propagidön Volapüki ün tim obsik. Vilom, das pük mekavik balid ad pageböb bevünetiko no deadon, e das utans, kels edaoptions pükis votik, sevons bosi dö on.

Jenöfo utans, kels gebons Volapüki adelo fomons famüli verätik, e me resodapads at kanons gudikumo sevön odi. Sekü atos, obinos gudik if Volapükans valöpo vedons limans. Somo zeils tel pafölons : utans, kels tuvons-la fädo padis at ologons, das Volapük lifon nog. Kanos binön, das neai büo esevons dö dabin püka, e das seko onitedälons dö on! Id utans, kels binons ya slopans Volapüka okanons kompenön pö bespiks, kels jenons us. Dämosöv if nitedälans tuvonsöv, das resodatoped at binon jenöfo te jin, e das te pösods tel u kils töbidons ad gebön oni.

Limans topeda at pelons nosi. Ad lisitön oni, penolsös leaktroniko lü „owner@yahoogleups.com,” e sagolsös, das vilols vedön limans Volapükagrupa. Pos tim nelunik, ogetols siami dalabana kobü jons anik fasilik. Alna ven liman blünön bosi Volapükapades, limans valik i getons osi in nünöms oka. Kodü atos, no zesüdös ai ad visitön Volapükatopedi. Klüluko if viloy reidön keblünotis valik in resodatoped at, täno mutoy visitön oni.

Utans, kels no dalabons nünömi spelabo osäkusadons obi demü spad, keli egebob ad plänön jenädi at, ab odasevons gudiko, das binon gönü Volapük.

Valikosi Gudikün Oles ed Olikanes

sedom

KLEILÜKOLÖD, BEGÖI SÄKÄDI OBIK

Reldan penom: Vödi IF kanob suemön, IFI ed IFÜ binons neklelliks, ab ÜF, ÜFO ed ÜFÜ binons müsters obe. Kanol-li yufön obl in tef at? Danö!
- - - - -

1. IF binon konyun, e sinifon, das stip bük dabimon :

- a) If no okanom kömön isio, no okanob kolkömön ko om;
- ä) Omogolobs if sagol vödi nog ball!
- b) If binoms dilekans, odalaboms nämäti tefik;
- c) Sagolöd ofe, das if osiof osi, odunob utosi, kell vilof;
- d) If kanols rönön vifiko, okanols kompenön pö spots at.

2. IFI pedefomon de konyun „If“ e sinifon „Igo if“ :-

- a) No ovisitob omi, ifi binom flenöfik;
- ä) Ifi dalabobs moni mödik, no vilobs nespälön oni;
- b) Mutoms finükön vobodi at, ifi no olaboms timi saidik;
- c) Ifi osagofs badikosi oles, no mutols feltön;
- d) Aluti, kell desirol, oglvob ole, ifi obinonöv laf regäna obik.

3. IFÜ i pedefomon de konyun „If“ e sinifon, das dun tefik pofölon te if vöd(s) po „Ifü“ polobedon(s). In tef at, no glömolöd, das vöd ballä muton binön subeat!

- a) Otedoy ko obs ifü get zepa calik;
- ä) Cälodoms ofi ifü diploms tefik;
- b) Ifü vestigs, poldans ollbükoms omi;
- c) Kursüd ojenon, ifü studans saidik;
- d) Obinof pladulan läna at, ifü sev pükas tel.

4. ÜF binon konyun e pagebon ad sinifön : In jenet, das :

- a) Üf zesüdosöv, kanoböv kömön odelo;

X:75:2002

- a) Givolōs obes tradutodi, ūf no osuemobs;
- b) Ūf nedrefoms treni, telefonolōs obi!
- c) Ūf desinols ad motāvōn ūn gōd odelā, obliboms domo;
- d) Oramenob taxidi, ūf vīlōl kōmōn vīfiko lū stajon.

ÜFO pedefomon de „üf“ e pagebon te in set säkik u lintelekik :

- If esagob bosi badik, sagolöd üfo obe, kisi badik esagob!
- Kikodo üfo flapol-li obi?
- Ab kin üfo okanon-li binön sefik?
- If üfo sevols ad givön givotis gudik, id ob sevob ad dunön otosi;
- Penolsös üfo penedi flenöfik ofe!

ÜFÜ i pedefomon de „üf“ ko sinif : „jenetü“ e pagebon te fo subsat :

- a) Visitlõls obl üfü täv ini Fransän;
- ä) Üfü matikamazäl, fat jlgama espikom;
- b) Eolkömob ko flens mödik üfü kongred;
- c) Üfü danüdamäted, elogol balidnaedo jimatani obik;
- d) Mödikans estunidons oli üfü televidabespik brefabüük.



OKIÄL

In sût zifa älogob, vi! mani:
 Äfeitom ya ko puls lenoidik.
 Ävilob medön, nu elogob panani,
 Kel egivom id obe konsäli legudik:
 „Neai töbolöd töbi, jüs töb töbon oli!

In sût zifa älogob, vi! vomî:
Maleditof nu palis lesufädik.
Ävilob medön, nu emernob lenomi,
Kel ägivom id obe konsäli lecädik:
„Neai töbolöd töbi, jüs töb töbon oli!

TÄVAVENTÜR IN KURDÄN (VII)
FA DOKAN KARL MAY

Pösod balid, keli älogob in ninedöp bumota, äbinon vom Kurdänik yunik. Päklotof me blit Türkänik, kel päkipon me plifils löpü futayoins feinik e kel äkazeton futilis smalik in juks smalik. Klotil blövik pebrodöl äzikloton hipis, e löpü klotil at, el *kaftan* maifik föfik ärivon jü kiens. Her leblägik peleodükon in herems vätik, in kels golda- e lagentakönäds änidons. Vom äbinof jönik, lejönik, ye lejönikünos äbinos log gretik silablövik, keli älüodof lü ob, dilo nuläliko, dilo kudiko. Su lam äpolof jipulili lelöfikün, kel älabof logis otik äs mot. Po of, Kurdänan yunik ätovom oki de glun. Sümöf äsagon obe, das son binom ela *Jeri Jir*. Äbinom matan voma yunik jönik.

"Ni, vro'l ker - deli gudik!" äglidob.

Bofikans nemödo äflegons seilölo kapi as gespik.

"*Sälam äleikum!*" äglidom el *Halef* Larabänapüko; no äsevom Kurdänapüki.

Äleikum sälam!" vom vifiko ägespikof.

Logod ela *Halef* süpo äläbikon.

"Lio? Spikol-li püki ela kuran e lekredanas verätik?" äsäkom.

"Sil" ägesagof.

"Hamdulillä - lellobö Godi; ibo anu no nedob seilön äsliko leyan el *cehénem!*" (= höl).

"Kim binol-li?" äsäkof.

"Sevolös, o rosad nebela at, o stel ela *yilak* at, das binob hiel *Haci Halef Omar Ben Haci Abul Ábas Ibn Haci Davud al Gósarà*, kompenan e jelan heroedana gretik at, kel is stanom fo ol. Edunobs ledunis mödik ed eplakobs ventüris gretik, täno ebinobs . . ."

"Dugolsöd jevodis olsik pödo!" äropom omi vög japik domasöla, kel inükömom po obs.

Sunädo älogob logedi, kaladapatädiki okikanas, das tu fleniko no ösufäloms obis. Sekü atos äsagob ome me ton leigo japik:

"O *Jeri-Jir*, okudol, das nims at kil ogetons vati e nulüdoti. Ab küpolöd, das dūnan obik ojütom Kurdānani alik, kel osteifülom ad doatön jevodi semik. Ob it ekömob lü löd ola as lotan ad takedön."

Ibüdöl anikosi ele *Halef*, ägolob ini lödöp nedetik. Su talaglun ve völs ädabinons stola- e jugalutapäds bigik, ed in zānod levöla äbinon geilot, kel pätegon me tapäd. Atos äbinos äs stimaseadöp, e leno ädesinob ad gebön oni. Äseitöl gūnis bofik oba lenilü ob, äseadob in plad et,, keli lofüdan nemon ai : 'rahat óturmak' (= takädön limis).

"Dälolös, das galädob vafis olik!" domasöl äsagom, kel isukom obi ko son oka e vom atana.

"Yagan neai lüvom vafis oka," ägespikob omi, "äsliko monitan neai lüvom jevodi. Alan, kel osteifülom ad doatön nimi oba u bal vafas obik podedidom fa ob, e te ol okodol atosi."

"Kikodo?"

"No efölol bligī flena, kel ävüdom obi in el *hani* olik. Mütol obi, das cedob oli ed eli *Zibari* olik as menis, kels binoms nuläliks dö ob. Binob flen ola; ibo okonsälöb ole te dinis somik, kels lönedons ad konsefön lifi olik."

"Nu spikol kleiliko! Sagob ole, das hiel *Emir Haci Kara Ben Nemsi* no neodom konsäli ola. Lif obik binon in nam Goda; egivom vafis at obe ad jelön obī. Ninädians fulū vat stanons is e bod saidik pro dels mödik binons us. Vilol-li, das jütob oli, e täno ogebob domi olik as fimod, se kel okanob nefikuliko sedön ini *cehéna* (= höl) valikis *Zibari* olik."

"Id obs labobs vafis!"

"Sus ol - seilö! No ojonidons. Ab obikans neai nedrefoms zeili, e büä mufol-la doati, binolöv in kolkömanef fatas olík. Krigan yunik at, kim binom-li?"

"Son oba!"

"E vom at-li?"

"Binof vom ota."

"So prüdolöd, das no odugol id onis ini päridükam! No binob pul, kel leadom cogön dö ok."

"O söl, kanob dunön nosi, büä esäkob manis obik. Igo el *Jeiq* no dalom primön bosì nen däl kriganas okik."

"Klu esagol neveräti obe diso in nebel. Lilolöd utosi, kelosi esludob: dom at leduton anu lü ob; son olik e vom oma dalons nükömön ninio. Vilob ai logön, das nügolöp binon maifik. Ojütob votikani, kel osteifulom ad nükömön. Ol ed of dalos libo kômön e golön, ab son olik oblibom is in spad at, ed if jü tim, ün kel sol stanon geiliküno no ublinol obe nuni, das binob lotan ola, ojütob omi. Ekö! Labob qüni ya in nami!"

Ävilom ropön obi, ab äläädob vifiko ed ävinegob, das seilomös.

"Seilö! Nu gololöd lo Qodè (= God) miserabik, if osagol vödi nog bal, ojütob bofikanis olas!"

Dido nuned oba äbinon mu riskädik, ab neai äbinob bevü utans, kels niludoms, das tävan mutom lovegolön mükiko e yiliko bevü nets.

(Fövoti konota at kanols reidön in Sirkülapenäd mula okömöl)



SPIKET LÖFÜLİK

Her bal jilöfana lütiron mödikumo, ka hobubs fol.

VOLAPÜK BINON DIV
FA IGOR WASILEWSKI

Ob suvo säkob obi, kikodo Volapük binon so veütik pro ob. Leigodü püks bevünetik votik pageböls ün tim nulädik - ledino Sperantapük - Volapük fūmo dalabon gebanis vo nemödikis. Mens ti valiks ai betikons suemovi sunädik pūka, keli vilons lärnön. Zuo suvo tikons, va okanons labön fruti gretik pos lärnām pūka pävälöl. Bo pluamanum menas vola igo no labons nitedi seimik tefü Sperantapük - pük bevünetik benosekikün. Klu, kisi tikons-li dö Volapük?

Verat binos, das kösömiko sevons nosi dö Volapük! Ven mäniotob Sperantapüki menes, anikans säkons igo: Dabinon-li nog? Ye ven spikob dö Volapük, pluamanum sagon, das neai älilons dö pük somik! Liedö! E kisi sagon-li Sperantapükans? Sperantapükans ti valiks älilons dö Volapük, ab mödikans tikons ottimo, das Volapük binon te musedot, dil jenava, neplu dabinöl. Kösömiko sevoy nemi Datuvala, hiel *Johann Martin Schleyer*, ab ti neai sevoy nemi dokana *Arie de Jong*. Zuo no sevoy, kis binon Volapük Perevidöl ed ün yel kinik pärevidon.

Kanos üfo jinön bisarik, das Volapük pagebon! Ye binos verat. Pagebon. Klu binos blöf, das dabinon. No binon deadik. Vöds lemödik Volapüka no binons suemoviks pö loged viföfik. Neodoy vödalisedi if binoy-la studan nulik. Suvo pösods somik klemons laistudami. I tikons: frut kisotik-li opubon sekü studam pūka at?

Pro ob Volapük binon div. Div pükik. Süpados obi, das ün tim anuik ti nek in vol sevon, kis Volapük binon, do bü yels plu ka tum Volapük äbinon levolut so gretik bevünetiko!

Pro ob Volapük binon div, bi dalabon KALADI lönik. Dalabon KEINOTI lönik. Dalabon müsteröfi jönik. Binon pük letikavik! No vilob tikön, va ogaenob fruti materik sekü gebam Volapüka. Logob, das pösods so nemödiks gebons oni. Atos no tomon obi. Gaenob fluki tikälik. Gebob Volapüki, bi stunidob jönöfi onik e püki it as jafod letälenana jänälik. Mutoy kälön oni. I demü veüt gretik Volapüka in jenav, no kanoy dälön nefölön oni. Kredob, das Volapük ai olabon Volapükānis fiedik, kels laikälons benostadi pūka onsik. Ojafons poedotis, otradutons konedis, ba olautons-la konedis nulik ito. Igo if obinons pösods töbo aniks, oblöfons, das Volapük lailifon!

NUNTIS SE VOL LÖLIK

LALBANÄNS SETEVONS

Za deg dötum lödanas mödotü balions 3,5 in Lalbanän esetevon ma cifodanef
Lalbanänik. Pluamanum onas etevons lü Grikän e Litaliyän.

RÖN POLAVOMIK

Mö naed folid enoganükoy masti polavomik. Jenon in zif Suomiyänik :
Sompajarvi. Kompenan alik mutom polön vomi lifayelas degvel + da
neltianarön lumotü mets 253,5. If peroy vomi, papöroy me sekuns läyümik
deglul. Gaenan getom limonadi leigü vet voma.

LÄGÜPTÄNAN GRETIK

Lägüptänan bälidotü yels foldeglul, ko vetot milgramas 450 edeadom ün yanul
1995 in zif : Alexandria. Man at äsufom lekäli, ab nensekiko. Lefilapoldans
tekldeg e krän äzesüdons ad blinön deadani se malädanöp. Ven äblinoy omi ini
malädanöp, vöi ämuton padosleatön in dom omik. Äbinom tu bigik ad kanön
gailön da yan.

TUHIKOS

Saunads kanons binön negudiks pro lif genik, nunodom yurinavan Spanyänik
se zif Madrid. Ma om, mans mödik plakoms säkädis genik fluköfa posä
egeboms tuvermo saunadi. Hit in saunad kanon fefiko läsükön mödoti e kaliyeti
sidaflumota maina.

NÄTIM BRITÄNIK

Balan se mans deg in Greta-Britän lenlabom niklotis otik dü dels tel jü kils
söikiks. Zuo balan se mans tum lenlabom niklotis dü vig bal, jonon dilet
Britänik. Balan se mans fol koefom, das no banom oki plu ka naeds tel a vig,
ab jinos, das läf genik no sufon sekü käled defik. Pluamanum gretik vomas
pebespiköl no sikänikofs kodü smel sueta.

NÄNS PENÜVEIGÖL

Dabinon def fefik nänas, sagom ganetan teatik Linglänik. Tü Kritid, teatöps
köömiko plöšenons : „ Nifavietik e Nänas Vel,“ ab emutoy nüveigön nänis
Nedänik ad pledön roulis tefik. Teatöps votik cälons cilis u gebons pupis se
papür.